



10 Mac 2022
10 March 2022
P.U. (A) 53

WARTA KERAJAAN PERSEKUTUAN

FEDERAL GOVERNMENT GAZETTE

PERATURAN-PERATURAN PEMBANGUNAN SUKAN (TATACARA DALAMAN BAGI PENYELESAIAN PERTIKAIAN DALAM BADAN SUKAN) 2022

SPORTS DEVELOPMENT (INTERNAL PROCEDURES FOR RESOLVING DISPUTES WITHIN SPORTS BODY) REGULATIONS 2022

DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

AKTA PEMBANGUNAN SUKAN 1997

PERATURAN-PERATURAN PEMBANGUNAN SUKAN
(TATACARA DALAMAN BAGI PENYELESAIAN PERTIKAIAN DALAM BADAN SUKAN) 2022

SUSUNAN PERATURAN-PERATURAN

Peraturan

1. Nama dan permulaan kuat kuasa
2. Tafsiran
3. Aduan pertikaian
4. Penubuhan jawatankuasa
5. Keanggotaan jawatankuasa
6. Setiausaha jawatankuasa
7. Notis pendengaran
8. Pendengaran
9. Ketidakhadiran pihak-pihak
10. Penangguhan pendengaran
11. Tempoh penyelesaian pertikaian
12. Keputusan
13. Pertikaian yang tidak dapat diselesaikan
14. Kecualian

AKTA PEMBANGUNAN SUKAN 1997

PERATURAN-PERATURAN PEMBANGUNAN SUKAN
(TATACARA DALAMAN BAGI PENYELESAIAN PERTIKAIAN DALAM BADAN SUKAN) 2022

PADA menjalankan kuasa yang diberikan oleh perenggan 38(2)(d) Akta Pembangunan Sukan 1997 [*Akta 576*], Menteri membuat peraturan-peraturan yang berikut:

Nama dan permulaan kuat kuasa

1. (1) Peraturan-peraturan ini bolehlah dinamakan **Peraturan-Peraturan Pembangunan Sukan (Tatacara Dalaman bagi Penyelesaian Pertikaian dalam Badan Sukan) 2022**.

(2) Peraturan-Peraturan ini hendaklah mula berkuat kuasa pada 15 Mac 2022.

Tafsiran

2. Dalam Peraturan-Peraturan ini, melainkan jika konteksnya menghendaki makna yang lain—

“anggota” ertinya seseorang yang menjadi ahli berdaftar kepada suatu badan sukan termasuk ahli sukan;

“jawatankuasa” ertinya jawatankuasa pertikaian dalaman yang ditubuhkan di bawah peraturan 4;

“pemohon” ertinya anggota badan sukan atau jawatankuasa badan sukan atau badan pengelola badan sukan yang membuat aduan pertikaian di bawah Peraturan-Peraturan ini;

“responden” ertinya anggota badan sukan atau jawatankuasa badan sukan atau badan pengelola badan sukan yang dinamakan dalam aduan pertikaian;

“setiausaha badan sukan” ertinya mana-mana orang yang memegang jawatan sebagai setiausaha bagi jawatankuasa induk badan sukan atau dalam keadaan jawatankuasa induk badan sukan itu tiada jawatan setiausaha, mana-mana orang yang memegang apa-apa jawatan setara yang melaksanakan fungsi yang sama seperti setiausaha bagi jawatankuasa induk badan sukan itu;

“setiausaha badan pengelola badan sukan” ertinya mana-mana orang yang memegang jawatan sebagai setiausaha bagi badan pengelola badan sukan atau dalam keadaan badan pengelola badan sukan itu tiada jawatan setiausaha, mana-mana orang yang memegang apa-apa jawatan setara yang menjalankan fungsi yang sama seperti setiausaha bagi badan pengelola badan sukan itu.

Aduan pertikaian

3. (1) Mana-mana pemohon hendaklah membuat aduan pertikaian secara bertulis dan mengemukakan aduan pertikaian itu kepada setiausaha badan sukan atau setiausaha badan pengelola badan sukan, mana-mana yang berkenaan, mengikut bentuk dan cara yang ditentukan oleh Pesuruhjaya.

(2) Aduan pertikaian yang dibuat di bawah subperaturan (1) hendaklah dikemukakan bersama dokumen sokongan bagi menyokong aduan pertikaian itu.

Penubuhan jawatankuasa

4. Suatu jawatankuasa hendaklah ditubuhkan dalam tempoh dua puluh satu hari dari tarikh aduan pertikaian diterima di bawah subperaturan 3(1) seperti yang berikut:

- (a) bagi aduan pertikaian antara anggota dengan anggota lain dalam badan sukan yang sama, jawatankuasa itu hendaklah ditubuhkan oleh badan sukan itu;
- (b) bagi aduan pertikaian antara anggota dengan jawatankuasa badan sukan yang sama, jawatankuasa itu hendaklah ditubuhkan oleh badan pengelola badan sukan itu; atau

- (c) bagi aduan pertikaian antara anggota dengan badan pengelola badan sukan yang sama, jawatankuasa itu hendaklah ditubuhkan oleh suatu badan pengelola badan sukan itu yang satu tahap lebih tinggi daripada badan pengelola badan sukan yang terlibat dalam aduan pertikaian itu.

Keanggotaan jawatankuasa

5. (1) Jawatankuasa yang ditubuhkan di bawah peraturan 4 hendaklah terdiri daripada seorang pengerusi dan apa-apa bilangan anggota yang ditentukan dan dilantik oleh badan sukan atau badan pengelola badan sukan mengikut penubuhan jawatankuasa di bawah perenggan 4(a), (b) atau (c), mengikut mana-mana yang berkenaan.

(2) Semasa apa-apa tempoh kekosongan jawatan anggota jawatankuasa, badan sukan atau badan pengelola badan sukan yang menubuhkan jawatankuasa di bawah perenggan 4(a), (b) atau (c) boleh melantik mana-mana anggota badan sukan untuk melaksanakan fungsi jawatankuasa.

Setiausaha jawatankuasa

6. Setiausaha badan sukan atau setiausaha badan pengelola badan sukan, mana-mana yang berkenaan, hendaklah menjadi setiausaha kepada jawatankuasa itu.

Notis pendengaran

7. (1) Pengerusi jawatankuasa hendaklah, dalam tempoh enam puluh hari dari tarikh jawatankuasa ditubuhkan, menetapkan suatu tarikh, masa dan tempat pendengaran aduan pertikaian.

(2) Setiausaha jawatankuasa hendaklah mengeluarkan suatu notis pendengaran aduan pertikaian itu kepada pemohon dan responden, atau saksi yang dinamakan oleh pemohon dan responden, dan menyampaikan notis itu mengikut cara yang ditentukan oleh setiausaha jawatankuasa.